

明譯天文書

上

天文書序

天理無象。其生人也。恩厚無窮。人之感恩而報。天也。心亦罔極。然而大道在天地間。茫昧無聞。必有聰明睿智。聖人者出。心得神會。斯道之妙。立教於當世。後之賢人。接踵相承。又得上古聖人所傳之妙。以垂教于來世也。聖人馬融。及後賢輩。有功於大道者。昭然可考。逮闊識牙耳。大賢者生。闡揚至理。作為此書。極其精妙。後

人信守尊崇。縱有明智。不能加規。而過矩也。

譯天文書序

皇上奉

天明命。撫臨華夷。車書大同。人文宣朗。爰自洪

武初。大將軍平元都。收其圖籍。經傳子史。

凡若干萬卷。悉上進。

京師藏之書府。

萬幾之暇。即召儒臣進講。以資治道。其間西
域書數百冊。言殊字異。無能知者。十五年。

秋九月癸亥。

上御奉天門召翰林

臣李翀。臣

吳伯宗而諭之

曰。天道幽微。垂象以示人。人君體天行道。
乃成治功。古之帝王。仰觀天文。俯察地理。
以修人事。育萬物。由是文籍以興。彝倫攸
叙。邇來西城陰陽家。推測天象。至為精審。
有驗。其緯度之法。又中國書之所未備。此
其有關於天人甚大。宜譯其書。以時披閱。

庶幾觀象。可以省躬修德。思患預防。順天
心。立民命焉。遂名欽天監靈臺郎。臣海達
臣兒。阿菴兀丁。圓圓大師。臣馬沙亦黑。臣
馬哈麻等。咸至于廷。出所藏書。擇其言天
文。陰陽曆象者。次第譯之。且命之曰。爾西
域人。素習本音。兼通華語。其口以授儒。爾
儒繹其義。緝成文焉。惟直述。毋藻繪。毋忽。
臣等奉

命惟謹。開局於

右順門之右。相與切摩。達厥本指。不敢有毫髮增損。越明年二月。天文書譯既。繕寫以進。有旨命臣伯宗為序。臣聞伏羲畫八卦。唐堯欽曆象。大舜齊七政。神禹叙九疇。歷代相傳。載籍益備。其言天地之變化。陰陽之闔闢。日月星辰之運行。寒暑晝夜之代序。與夫人事吉凶。物理消長。微妙弘衍矣。今觀西域。

天文書與中國所傳殊途同歸。則知至理
精微之妙。充塞宇宙。豈以華夷而有間乎。
恭惟

皇上心與天通。學稽古訓。一言一動。森若神明。
在上。凡禮樂刑政。陽舒陰歛。皆法天而行。
期於七曜順度。雨暘時若。以致隆平之治。
皇上敬天勤民。即伏羲堯舜禹之用心也。經傳
所載。天人感應之理。存于方寸審矣。今又

譯成此書。常留

睿覽兢兢戒慎。純亦不已。若是其至哉。是書遠出夷裔。在元世百有餘年。晦而弗顯。今遇聖明。表而為中國之用。備一家之言。何其幸也。聖心廓焉大公。一視無間。超軼前代。遠矣。刻而列之。與中國聖賢之書並傳並用。豈惟有補於當今。抑亦有功於萬世云。洪武十六年五月辛亥。翰林檢討臣吳伯宗謹序。

天文書目錄

凡天文書有四類。第一類。總說題目。第二類。斷說世事吉凶。第三類。說人命運。并流年。第四類。說一切選擇。

第一類。凡二十三門。

第一門。說撰此書為始之由。

第二門。說七曜性情。

第三門。說七曜吉凶。

第四門說七曜所屬陰陽。

第五門說七曜所屬晝夜。

第六門說各星離太陽遠近性情。

第七門說五星東出西入。

第八門說雜星性情。

第九門說十二宮分分為三等。

第十門說十二宮分陰陽晝夜。

第十一門說十二宮分性情。

第十二門說十二宮分度數相照。

第十三門說七曜所屬宮分。

第十四門說七曜廟旺宮分度數。

第十五門說三合宮分主星。

第十六門說每宮分度數分屬五星。

第十七門說每宮分為三分。

第十八門說各星宮度位分。

第十九門說七曜相照。

第二十門說各星力氣。

第二十一門說命宮等十二位分。

第二十二門說福德等箭。

第二十三門說各宮度主星強旺。

天文書第一類

第一門 說撰此書為始之由

凡書中緊要之理。則備言之。其說有兩等。第一等說。要知天輪行度之法。必用渾儀。并測星之物。以算法推詳其理。為此已撰二書在前。若人於此書精通。則知此為至高至實之文。第二等說。天輪七曜。有吉有凶。應世上之吉凶。其吉凶云何。必用上文所言渾儀算法。體驗而後知之。

然非一定之理。間有不驗之時。不可因其不驗。
遂廢此書也。如太陽性熱且燥。太陰性濕潤。又
如四時不等。寒暑不同。或雨多。或雨少。因各星
與太陽相遇。或太陽與各星相遇。在何宮分。或
各星自相遇。以此故也。此是顯然之理。自古相
傳至今。若人參透各星性情衰旺。及相遇度數。
則知四時寒暑旱澇疾疫。又知人事禍福吉凶。
既能先知。凡事可以豫備。

第二門 說七曜性情

太陽性熱。且燥。能熱所照之物。太陰性濕潤。所照之物。亦得滋潤。土星性寒。微燥。木星性溫和。又熱而潤。熱多潤少。火星性極燥。極熱。金星性亦溫和。又熱而潤。潤多熱少。水星性不定。遇熱則熱。遇寒則寒。遇潤則潤。遇燥則燥。又說。水星屬氣。生風。

